

# Nova pagina d'internet per la ULR

Da la radunanza da la Uniun per la litteratura rumantscha

■ (mc) **L'Uniun per la litteratura rumantscha ha ina nova preschientscha sin l'internet, la proxima revista «Litteratura» è deditgada al tema «generaziuns» ed ils Dis da litteratura han puspè lieu dals 7 en fin als 9 da november a Domat.** Uschia ha la nova presidenta da la Uniun per la litteratura rumantscha *Chatrina Josty* infurmà dumengia passada la dunsaina da scripturas e scripturs rumantschs radunads a Cuira per la radunanza generala. Sco quai che la presidenta ha sincerà haja la nova squadra da suprastanza cun *Fadrina Hofmann*, *Flurina Badel* ed *Arno Camenisch* cumenzà l'atun passà cun bler curaschè a restructurar l'uniun per uschia savair prestar lavur effizienta en l'avegnir.

## Nova pagina d'internet

Sco emprima novaziun po la presidenta annunziar la realisaziun da la nova pagina d'internet. Sut [www.litteraturarumantscha.ch](http://www.litteraturarumantscha.ch) chattan ins uss actualitads ed infurmaziuns davart la litteratura rumantscha e davart las activitads da la Uniun per la litteratura rumantscha. Cunquai che la ULR n'è betg pli ina uniun exclusiva per commembers che han gia publicà ovras litteraras n'hajan ins betg surpiglià la survista da las auturas e dals auturs da la pagina viglia, ha declarà *Chatrina Josty*. Quels che tschertgan dentant indicaziuns davart ils scripturs rumantschs possian dentant consultar il lexicon «Autoren der Schweiz» sut [www.a-d-s.ch](http://www.a-d-s.ch) che saja colliada cun la pagina d'internet da la ULR. Sche auturas ed auturs veglian metter l'atgna biografia sin quest lexicon electronic possian els far quai cun il formu-

lar correspondent sin la pagina numnada. Là possian ins er administrar l'agen profil, ha orientà la presidenta.

## Revista «Litteratura»

La proxima numera da la revista litterara «Litteratura» che vegn a cumparair il november 2008 è deditgà al tema «Generaziun». Ils texts correspondent ston esser inoltrads fin l'entschatta fanadur. El pon avair ina lunghezza maximala da 6000 segns ed els pon esser scrits en in dals idioms u en rumantsch grischun. Per quest numer da la Litteratura èn ils suprastants *Arno Camenisch* ([arno.camenisch@gmx.ch](mailto:arno.camenisch@gmx.ch)) e *Fadrina Hofmann* ([fadimari@bluewin.ch](mailto:fadimari@bluewin.ch)).

Al «dialog litterar» lantschà da la ULR han fin qua sulet *Göri Klainguti/Flurina Badel* e *Rita Uffer/Pia Valär* contribuì. Per mancanza d'interess da vart da las scripturas e dals scripturs n'ha il lavuratori da scriver deplorablmain betg pudì vegnir realisà.

## Dis da litteratura a Domat

*Silvana Derungs* ed *Anita Simeon* han orientà ch'ils Dis da litteratura hajan lieu quest onn dals 7 en fin als 9 da november puspè a Domat. Els èn deditgads al tema «Italianità» e vegnan organisads en cooperaziun cun la Pro Grigioni Italiano. La concorrenza Premi Term Bel vegn quest onn er ad esser averta per scripturs talians. Il texts da la concorrenza vegnan a vegnir prelegids il venderdi saira e la surdada dal premi ha lieu da nov la sonda avant mezdi e betg pir la dumengia suenter mezdi. La sonda ha lieu la vernissascha da duas ovras novas da *Domenic Andry* e da *Fadrina Hofmann* sco era

la perschentaziun dal «Chalender da litteratura rumantscha». A preleger en il rom dals Dis da litteratura vegnan tratter auter *Rita Uffer*, *Beni Vigne*, *Chatrina Josty* ed *Arno Camenisch*. Na betg mancar dastga natiralmain era questa giada il giast da surpraisa.

## Tschernas e rendaquint

A la radunanza da delegads da la Lia Rumantscha trametta l'Uniun per la litteratura *Fadrina Hofmann*, *Arno Came-*


*nisch* ed *Aita Dermont-Stupan*. Sco suppleants funcziunan *Anita Simeon*, *Flurina Badel* ed *Oscar Peer*.

Il quint annual da l'Uniun per la litteratura rumantscha serra tar entradas da 41 870 francs cun in gudogn da 14 471 francs. La bilanza è cudischada cun 51 609 francs. Sco quai che *Chatrina Josty* ha declarà è il quint sorprendentmain positiv perquai che la suprastanza ha renunzià ad in onurari.

En il preventiv 2008 che quinta cun

entradas e sortidas da 55 400 francs han ins prevì 20 000 francs per ils custs da produczion da la Litteratura e 10 000 francs per ils Dis da litteratura, 4000 francs per lectorats e 4000 francs per il secretariat.

Sut varia ha *Martin Cabalzar* repetì l'offerta da La Quotidiana da metter a disposiziun a la ULR ina giada per mais ina pagina per realisar ina atgna pagina litterara en la gasetta quotidiana dal di ed uschia propagar la litteratura rumantscha a moda pli vasta.



La Uniun per la litteratura rumantscha dispona uss d'ina nova pagina d'internet: [www.litteraturarumantscha.ch](http://www.litteraturarumantscha.ch).